



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato:

13. juli 2012

J.nr.:

01.31.06/12-00589

Aningaasaqarnermut Naalakkersuisoq

Tallimangornermi 13. juli 2012 Aningaasaqarnermut Akileraartarnermullu Ataatsimiititaliap aalajangernera pillugu Naalakkersuisunut ilisimatitsissut – Suliaq nr. 01.31.06/12-00589

Maniitsup Efterskolianut, Qaqortumi ilinniartunut inissiamik pisinermut aamma Aasianni GU-p allilerneqarnissaanut aningaasaliissutit ilaneqarnissaannik qinnuteqaat.

Naalakkersuisut **inassutigaaat,**

- kontomi pingaarnermi 84.40.12 Ilinniartitaanermut sanaartukkat, suliassamut nr. 070.52.068 Maniitsup Efterskolia, atuarfimmik aamma ilinniartut inaannik allanngortiterineq, aningaasaliissutit 9,7 mio. koruuninik amerlineqassasut, aamma suliassamut nr. 100.52.061 Aasianni GU-p allilerneqarnera, aningaasaliissutit 30,2 mio. koruuninik amerlineqassasut, aamma
- kontomi pingaarnermi 84.40.15 Ilinniartut inaannik sanaartorneq, suliassamut nr. 150.52.071 Uummannami atuartut inaat, aningaasaliissutit 5,0 mio. koruuninik ikilisinneqassasut, suliassamut nr. 020.52.076 Ilinniartut inissaannik pisineq, Qaqortoq, aningaasaliissutit 2012-imi 0,15 mio. koruuninik amerlineqassasut, aamma
- kontomi pingaarnermi 80.00.00 Sanaartornermut atugassat agguanneqanngitsut, aningaasat 2012-imi Aasianni GU-p allilerneqarnissaanut immikkoortinneqartut 25,0 mio. koruuninik ikilisinneqassasut, aamma Nuummi ilinniartut inaannut aningaasat immikkoortinneqartut 2,0 mio. koruuninik ikili-sinneqassasut, aamma Sisimiuni ilinniartut inaannut aningaasat immikkoortinneqartut 3,7 mio. koruuninik ikilisinneqassasut, aamma
- kontomi pingaarnermi 40.90.03 Namminersorlutik Oqartussat illuutaannik aserfallatsaaliuineq, aningaasaliissutit 2012-imi 4,35 mio. koruuninik ikilisinneqassasut, aamma

- kontomi pingaarnermi 84.40.12 Ilinniartitaanermut sanaartukkat, suliassamut nr. 100.52.059 Aasianni GU-p allilerneqarnera, aningaasaliissutit 2013-i, o 35,6 mio. koruuninik amerlineqassasut, aamma
- kontomi pingaarnermi 84.40.15 Ilinniartut inaannik sanaartorneq, suliassamut nr. 996.52.059 Ilinniartut inaannik pilersaarusionerq sanaartorerlu, 2013, aningaasaliissutit 2013-imi 10,6 mio. koruuninik ikilisinneqassasut, aamma
- kontomi pingaarnermi 80.00.00 Sanaartornermut atugassat agguanneqanngitsut, aningaasat 2013-imi Aasianni GU-p allilerneqarnissaanut immikkoortinneqartut 20,0 mio. koruuninik ikilisinneqassasut, aamma aningaasat Aasianni ilinniartunut inissianut immikkoortinneqartut 5,0 mio. koruuninik ikilisinneqassasut, aamma

- kontomi pingaarnermi 84.40.12 Ilinniartitaanermut sanaartukkat, suliassamut nr. 100.52.061 Aasianni GU-p allilerneqarnera, aningaasaliissutit 2014-imi 2,2 mio. koruuninik amerlineqassasut, aamma
- kontomi pingaarnermi 80.00.00 Sanaartornermut atugassat agguanneqanngitsut, aningaasat 2014-imi Aasianni ilinniartut inaannut immikkoortinneqartut 2,2 mio. koruuninik ikilisinneqassasut, aamma

- kontomi pingaarnermi 84.40.12 Ilinniartitaanermut sanaartukkat, suliassamut nr. 100.52.061 Aasianni GU-p allilerneqarnera, aningaasaliissutit 2015-imi 2,2 mio. koruunik amerlineqassasut, aamma
- kontomi pingaarnermi 80.00.00 Sanaartornermut atugassat agguanneqanngitsut, aningaasaliissutit 2015-imi 2,2 mio. koruunik ikilisinne-qassasut.

Aningaasaqarnermut Ataatsimiititaliap oqaaseqaatai

Suliassami matumani Naalakkersuisut Maniitsup Efterskolia, Aasianni GU Qaqortumilu ilinniartut najugaqarfiat eqqarsaatigalugit arlalitsigut aningaasaliissutinik allanngortitsisoqarnisaanik qinnuteqarput. Kingulleq taaneqartoq eqqarsaatigalugu ataatsimiititaliaq oqaaseqaateqarnissaminut pissutissaqartitsinngilaq.

Maniitsumi efterskolip allilerneqarnissaa eqqarsaatigalugu suliniummut aningaasaliissutit 4,3 mio. kr.-init 14,0 mio. kr.-inut qaffanneqarnissaat Naalakkersuisut qinnutigaa. Taamaalilluni qaffariaat 9,7 mio. kr.-iuvoq, 225 procentinik qaffaanermut naapertuuttoq.

Aasianni GU-p allilerneqarnissaa eqqarsaatigalugu suliniummut aningaasaliissutit 50 mio. kr.-init 75,2 mio. kr.-inut qaffanneqarnissaat Naalakkersuisut qinnutigaa. Taamaalilluni qaffariaat 9,7 mio. kr.-iuvoq, 50 procentinik qaffaanermut naapertuuttoq.

Taamatut missingersuutinik annertuumik sippuinerit ataatsimiititaliamik pissutissaqalersitsipput Ineqarnermut, Attaveqarnermut Angallanermullu Naalakkersuisumik ullumi apersuinisamut aggeqqusinissamut.

Ataatsimiititaliaq apersuinissamut makkuninnga apeqquteqarpoq:

”

1. *Naalakkersuisoq nammineq isumaqarpa sippuinerit pineqartut sanaartugassanik aningaasaqarniarnikkut akisussaassuseqartumik aqutsinermut naapertuuttut?*
2. *Ataatsimiititaliaq isumaqarpoq missingersuutinik sippuinissanut nassuiaataasut tamakkiisuunngitsut. Taamaattumik sukumiinerusumik nassuiaasoqarnissaa kissaati-gineqarpoq minnerunngitsumik efterskolie eqqarsaatigalugu, tassani ilaatigut erseq-qissumik maluginiartariaqarmat efterskolimi atuartut tiguneqarsinnaasut qulinik amerliniarlugit alliliiniarneq 9,7 mio. kr.-inik akeqassamat, atuartumut ataatsimut 970.000 kr.-inut naapertuuttumik!*
3. *Aasianni GU eqqarsaatigalugu AIS12-imi oqaasertaliussamut nr. 4-mut innersuusi-soqarpoq. Oqaasertaliussami takuneqarsinnaavoq ukiuni missingersuusiorfusuni sanaartugassanut aningaasaliissutinik timitaliinissaq Aningaasaqarnermut Ataatsimiititaliap akuerisinnaagaa missingersuutit B-t pigineqartillugit. Qinnuteqaammili takuneqarsinnaavoq matumani taamaallaat missingersuutit C-t suliarineqarsimasut.. Taamaalilluni qinnuteqaatip 2013-2015 tunngasortaanik akuersissuteqarnissamut ataatsimiititaliaq tunngavissaqanngilaq, taamaalillunilu qinnuteqaatip tamatuma tunngasortaata Naalakkersuisut AIS13-imut ilannguttariaqassagaat isumaqarnarluni. Tamatumunnga Naalakkersuisoq sunimmita oqaaseqaatissaqarpa?*
4. *Qinnuteqaammi ilisimatitsissutigineqarpoq Maniitsup Efterskolia eqqarsaatigalugu missingersuutinik sippuinerimut annertunerusumik tunuliaqutaasoq missingersuutit C-t tunngavigalugit aningaasaliissutinik qinnuteqartoqarsimanera. Aningaasaqarnermut ataatsimiititaliap siusinnerusukkat arlaleriaqaluni isornartorsiorlugulu uparuartareeraluarpaa sanaartugassanut aningaasaliissutinik qinnuteqartoqartariaqan-ngikkaluartoq missingersuut B-t piareersimatinnagit! Taamaakkaluartorli tassa Naalakkersuisut maanna missingersuutit C-t tunngavigalugit Aasianni GU-mut 30,2 mio. kr.-inik ilassutitut anin-*

gaasaliiffigineqarnissaminnik qinnuteqarput! Naalakkersuisoq ilumut isumaqarpa taman-na akisussaassuseqartumik pissusissamisoortumillu suleriaasiusoq?

5. Ilumoorpa Maniitsup Efterskolia pillugu 2011-mi juunimi aningaasaliissuteqarfissatut suliassamut 11-537-imut atatillugu Aningaasaqarnermut Ataatsimiititaliamut ilisimatitsissutigineqanngimmat suliniut allartinneqassasoq missingersuutit C-t tunngavigalugit? Taamaalluni suna tunngavigalugu tamatumaa ilisimatitsissutigineqannginnissaa aalajangerneqarpa, aamma sooq ukioq ataaseq qaangiuttoorlu aatsaat paasineqarpa aningaasaliissutit naammangitsut?

6. Suliniutinut marlunnut taakkununga aningaasartuutissat qanoq annikillisarniarne-qarsimappat, suliniutit aningaasaliissutillu imminnut naapertuuneroqqullugit?

7. Efterskole eqqarsaatigalugu innarluutilinnik atuortoqartalernissaq ilanngullugu eqqarsaatigineqarsimanerpa?

8. Ilumut piviusorsiorpa naatsorsuutigissallugu atuartitsinerup aallartinnissaanut efterskolip allilernerneqarnissaata naammassereersimanissaa? Sanaartornermut pilersaarut qanorpiarmita oqarpa?"

Naalakkersuisup akissuteqaatai, oqaaserisassani apersuinissamut tunniunneqartuni takuneqarsinnaapput. Taakku aalajangiinnermut matumunga qarasaasiakkut ilanngullugit nassiunneqarput.

Apersuineq tunngavigalugu ataatsimiititaliaq isumaqarpoq suliniutit taakku marluk pisariaqartumik aningaasaliissutitigut akunneqarsimanninnerat **sakkortuumik assuiarineqartariaqartoq**. Ataatsimiititaliaq isumaqarpoq aningaasanut inatsimmi sanaartugassatut pilersaarutit Inatsisartut pingaarnersiuisinnaanerit ajornarsissasoq, sanaartugassatut pilersaarutit missingersuutit piviusorsioortut tunngavigalugit saqqummiunneqarneq ajorpata. Suliassat aalajangersimasut matumani pineqartut marluk eqqarsaatigalugit imaangilaq suliniutit aallartinniarlugit Inatsisartut aalajangersimassagaluartut Aningaasanut inatsisissap akuersissutigineqarnissaata nalaani missingiinnerit maanna ilisimaneqalersut ilisimaneqarsimasuuppata. Massakkorpiarli suliniutit unitsinneqarsinnaanngitsutut isumaqarfigineqarput.

Ataatsimiititaliap maluginiarpaa suliniutit tamarmik C-nik missingersuutaagallartut tunngavigalugit aallartinneqarsimasut. Aningaasaqarnermut Ataatsimiititaliap ukiorpassuannortuni arlaleriaqaluni paatsuugassaangitsumik erseqqissartareerpaa, missingersuutit taamaattut sanaartugassatut suliassat aningaasaliissuteqartarnikkut akuerineqartarnissaannut patajaatsuumik tunngavissatut isigineqarsinnaanngitsut. Maniitsumi efterskole eqqarsaatigalugu ataatsimiititaliap paasivaa Naalakkersuisut Inatsisartunulluunniit paasissutissiissuteqarsimannngitsut suliniutit aallartinniarneqarmata missingersuutit C-t tunngavigalugit, tamannalu immiini amigaaatit **assut ajuusaarnartutut** isigineqartariaqarpoq. Ataatsimiititaliap maluginiarpaa Naalakkersuisup apersuinermit paatsuugassaangitsumik oqaatigimmagu apeqquumi tamatumani Aningaasaqarnermut Ataatsimiititaliaq isumaqatigigamiuk, neriorsuutigalugu taamatut pisoqaqqinnginnissaa qularnaarniarlugu timitalimmik suliniuteqarniarluni, tamanna ataatsimiititaliap immiini pisariaqartutut naammaginarlutullu isigaa. Ataatsimiititaliap naatsorsuutigaa siunissami sanaartugassatut suliniummik sunnguamilluunniit aallartitsisoqassanngitsoq missingersuutit C-t kisiisa tunngavigalugit, taamatullu aamma siunissami pinngitsoqarani ilisimatitsissutigineqartassasoq arlaannik pissuteqartumik tamatumaa sanioqqunneqarnissaa Naalakkersuisut pisariaqartilissagaluarpassuk.

Apersuinermit saqqummiunneqartut tunngavigalugit ataatsimiititaliap erseqqissuumik oqaatigisavaa Aningaasaqarnermut Ataatsimiititaliamit sunnguamilluunniit naalakkersuinikkut tati-si-niartoqarsimannngimmat, naak suliniutissat naammassillugit suli pilersaarusiorneqarsimann-gikkaluartut, suliassat matumani pineqartut siuarsarniarlugit, taamaattumillu missingersuuti-

nik sippuinernik matumani pineqartunut sunnguamilluunniit akisussaaqataanninninni Aningaasaqarnermut Ataatsimiititaliap tamakkiisumik erseqqissartariaqarlugu. Akerlianik ataatsimiititaliaq isumaqarpoq Naalakkersuisunut ilaasortap naalakkersuinikkut tatisiniarnerit suugaluartulluunniit aningaasaqarniarnikkut akisussaassuseqanngitsumik pissusilersulernissamut aqquataasinnaasut suugaluartulluunniit itigartittariaqaralarai.

Ataatsimiititaliap ilanngullugu naluginiarpaa Naalakkersuisunut ilaasortap apersuineri ilisimatitsissutigimmagu missingersuutinik sippuinissanut matumani pineqartunut nassuiaatit ilagimmassuk suliassamut naalakkersuisoqarfiup (IIN) aamma Ineqarnermut, Attaveqarnermut Angallanermullu Naalakkersuisoqarfiup akornanni pitsaanngitsumik ataqatigiissaarisoiqarsimanera. Naalakkersuisunut ilaasortap neriorsuutigaa ataqatigiissaarinerup tamatuma pitsaanerulernissaa sulissutiginiarlugu. Ataatsimiititaliap tamanna aamma pisariaqartutut naammaginartutullu isigaa, taamaattorli ataatsimiititaliap aamma oqaatigerusullugu maluginiannigitsuunnginnamiuk taamatut ataqatigiissaariniarnermi ajornartorsiutaasartut ukiorpaalunngortuni uteqqiassimmata. Taamaattumik pitsaanagerusumik ataqatigiissaarisalernissamut suliniutit annertuumik pitsanngoriaateqarfiunissaat pisariaqarpoq. Ajornartorsiut tamanna aamma allaffissornikkut aqutsisuusunit eqqumaffigineqartariaqarpoq.

Ataatsimiititaliaq ajoraluartumik isumaqarpoq suliniutit tamaasa eqqarsaatigalugit suli missingersuutinik sippuisoqarsinnaanissaa annilaangatigineqartariaqartoq. Aasianni GU allilerneqarniarpoq missingersuutit C-t tunngavigalugit, Maniitsumilu efterskole eqqarsaatigalugu apersuineri Naalakkersuisunut ilaasortap oqaaserisai tunngavigalugit itigartivinneqarsinnaagunarani atuartitsineri piumasaqaatit tunngavissallu tunngavigalugit suli aningaasaliissutinik amerlanerusunik pisariaqartitsisoqarsinnaanera. Suliniutit matumani pineqartut eqqarsaatigalugit missingersuutinik sippueqqittoqassappat tamanna ataatsimiititaliap **akuersaaruminaartissavaa** – minnerunngitsumik tamanna naalakkersuisoqarfiit akornanni ataqatigiissaarisimanniginnermik pissuteqassagalarpat.

Apeqqutip tamatuma sukumiinerusumik paasisaqarfigineqarnissaa siunertaralugu ataatsimiititaliap kissaatigaa Ilinniartitaanermut, Ilisimatusarnermut Nunallu avannarliit suleqatigiinnerannut Naalakkersuisup erseqqissumik **ilisimatitsissutigissagaa**, naalakkersuisoqarfimmi suliassaq qanoq siuarsarniarsimaneraa ilaatigullu atuartitsineri piumasaqaatit malitsigisaanik missingersuutinik sippuinerit qanoq killilersimaarniarsimanerai.

Apersuineri apeqqut 3 naapertorlugu inassuteqaatit ukiunut missingersuusiorfiusunut tunngasortai ataatsimiititaliap itigartippai, ataatsimiititaliaq Missingersuutit pillugit inatsit naapertorlugu tamatumunnga tunngavissaqanngimmat, matumani missingersuutit C-t kisimik pineqarmata. Ataatsimiititaliap kissaatigaa aningaasaliissutinik qinnuteqaatinik inatsisit naapertorlugit akuerisinnaanngisaminik siunissami **nassinneqartannginnissi**. Taamatuttaaq **ajoraluartumik arajutsineqarsinnaanngilaq** Ineqarnermut, Attaveqarnermut Angallanermullu Naalakkersuisoqarfiup, Aningaasaqarnermut Naalakkersuisoqarfiup Naalakkersuisulluunniit ataqatigiissaarineri ataatsimiititaliaata K-gruppimik taaneqartartup qinnuteqaammii amigaat taama erseqqitsigisoq maluginiarsimannigimmassuk.

Kiisalu oqaatigineqassaartaaq apersuineri Naalakkersuisup ilisimatitsissutigimmagu Maniitsumi efterskolip allilerneqarnera aatsaat ulloq 1. januar 2013 atorneqarsinnaalissasoq. Tamatuma malitsigisaanik piffissamut august 2012-imiit januar 2013-imut aningaasartuutaanerusiinnaasut tunngavissiiisinnaasussaannigillat Aningaasaqarnermut Ataatsimiititaliamut qinnuteqaqqinnissamut, taamaattumillu taamatut aningaasartuutaanerusiinnaasut aningaasaliissutaareersut iluannit tiguneqartariaqassallutik.

Aningaasaqarnermut Ataatsimiititaliap aalajangenera

Qulaani allassimasutut paasinnilluni Aningaasaqarnermut Ataatsimiititaliap ukioq aningaasanut inatsiseqarfik 2012 eqqarsaatigalugu inassuteqaatit **akuera**i.

Ukiut missingersuusiorfiusut eqqarsaatigalugit inassuteqaatit Aningaasaqarnermut Ataatsimiititaliap **itigartippai**, taakkuninnga akuersissuteqarnissamut ataatsimiititaliaq inatsisitigut tungavissaqanngimmat.

Apeqqutinik qulaani taaneqartunik Naalakkersuisut akissutaat kingusinnerpaamik ulloq 1. august 2012 kalaallisut qallunaatullu qarasaasiakkut assilinerat nch@ina.gl-imut ilanngullugit nassiteqquneqarput.

Aningaasaqarnermut Ataatsimiititaliaq sinnerlugu

Olga P. Berthelsen
Siulittaasup tullia